

Noticia
Transparente
di Gobierno

ISLA ONLINE

Diaranson 14 Augustus 2024

Email: IslaOnline@gobierno.aw Tel: 528-4952

ARTE DI MURAYA
SAN NICOLAS



**STABILIDAD
Y
PROSPERIDAD**

2 0 2 4



Gabinete Wever-Croes



Den conexion cu e reunion cu e comision encarga cu regulacion di e vehiculonan UTV y ATV

PA GOBIERNO DI ARUBA E META PRIMORDIAL TA, PA SIGURA SEGURIDAD DEN TRAFICO, Y PA E PEATONNAN



Diamars 13 di Augustus, Consejo di Minister tabata tin un reunion cu e comision encarga cu regulacion di e vehiculonan UTV y ATV. Prome Minister Evelyn Wever-Croes a indica cu na aña 2022, Gobierno a insitui un comision di nobo pa pone un poco mas atencion na e tipo di vehiculonan aki, mirando cu no semper nan ta safe y tabata involvi den accidentenan basta grave den pasado.

Gobierno a bin ta haya varios keho, di habitantenan cu ta

biba mas den areanan na unda e vehiculonan aki ta pasa, pa motibo di desordo cu nan ta haci y e stof cu nan ta lanta. Tambe kehonan ta drenta cu ora e vehiculonan aki ta riba caminda, nan ta para y stroba trafico. Y e efecto cu e vehiculonan aki tin riba naturalesa tambe ta preocupante.

E atraccion aki ta uno hopi gusta pa nos bishitantenan y pa e motibo aki, e comision encarga a bin ta traha ya caba un aña riba diferente posibilidad pa mantene na un manera safe. Departamento di Transporte Publico a duna un presentacion con pa efectua un miho control riba e vehiculonan aki, Dienst Technische Inspectie (DTI) a mustra e partinan di peligro cu tin, y Departamento di Impuesto a bin cu un proposicion pa crea un categoria nobo, special pa por registra e tipo di vehiculonan aki.

E meta primordial di Gobierno ta pa regula y bin cu rekisitonan cu tur compania cu ta ofrece e vehiculonan aki como atraccion, mester cumpli cu ne. E vehiculonan lo mester wordo "gekeurd", y nan mester ta segura y cumpli cu exigencianan di seguridad pa asina por garantiza cu tur hende ta sigur. Gobierno tambe ta trahando riba rutan alternativo pa evita cu e vehiculonan akita pasa tur caminda y destrui naturalesa. Aki e departamento di naturalesa y medio ambiente tin un rol sumamente importante pa asina bin cu e cambionan den ley necesario.

Otro tema importante cu a wordo discuti ta e stepnan, segway, scooter y e-bikes. Algun di nan ya caba ta cay den categoria conoci pero otro no. Prome Minister a expresa cu un step of segway no ta vehiculonan cu mester ta riba caminda ni banda di caminda, pasobra no tin permiso pa esaki. Mirando cu ya tin companianan cu ta ofrece e medio di transporte aki, lo mester sinta cu nan pa delibera con pa yega na regula esakinan tambe. Pa Gobierno segura seguridad den trafico y pa nos peatonnan ta primordial, y p'esey lo traha duro na yega na decisionan beneficioso pa tur involvi. ■■■





MINISTER

Ursell Arends

TUMA PRECAUCION PA TEMPORADA DI CALOR EXCESIVO

Aruba ta experienciando un periodo di calor excesivo cu temperaturanan di entre 34-36°C durante dia y un indice di calor di asta 44°C cu ta indica e nivel di calor percibi pa hende ('feels like'). Nivelnan halto di humedad, combina cu un alivio minimo durante anochi por conduci na incomodidad y hasta riesgonan pa salud. E temporada aki lo continua pa lunanan di augustus, september y october.

E situacion di temperaturanan extremo ta wordo empeora door di cambio climatico cu ta hisa e frecuencia y intensidad di olanan di calor mundialmente.

Pa seguridad durante e periodo aki ta esencial pa tuma algun precaucion:

1. Keda hidratata: Bebe suficiente awa y evita bebidanan cu hopi sucu.
2. Limita actividad pafo: Limita actividad fisico pa oranan di mainta of anochi ora ta mas fresco.


3. Busca sombra of ta paden: Keda den ambientenan cu airco ora cu ta posibel.

4. Bisti adecuadamente: Paña los cu colornan cla ta yuda mantene bo curpa fresco.

5. Uza protector solar (sunblock): Proteha bo cuero di rayonan ultravioleta(UV) intenso door di hunta protector solar regularmente.

E medidanan aki no solamente ta crucial pa comodidad pero tambe ta yuda preveni problemanan di salud ocasiona pa calor cu lo por asta pone bo bida na peligro. Esaki ta conta specialmente pa mucha chikito, adultonan mayor y esnan cu problema si curason.

Ministerio di Transporte, Integridad, Naturalesa y Asuntonan di Adulto Mayor ta urgi tur ciudadano pa tene nan propio bienestar y di otronan na cuenta durante e temporada di calor excesivo aki.






Preveni Bira Malo Door di Calor na Trabou

Ta exponi na calor **paden** of **pafo** por ta peligroso

Maneranan pa Proteha Bo Mes y Otronan

Cuminsa Poco Poco. Casi 3 di 4 Fatalidad door di Calor ta Ocuri e Prome Siman di Trabou.



- ✓ Trahadonan **nobo** mester hisa nan tolerancia (aclimatiza) di calor y tuma un descanso frecuentemente.
- ✓ **Sigui e regla di 20%.** Ariba e prome dia no traha mas cu 20% di e shift na full intensidad. Hisa e duracion di full intensidad no mas cu 20% cada dia te ora trahadonan ta custuma di traha den calor.



Bebe Awa Friu

Bebe awa friu asta si bo no tin sed.
1 cup cada 20 minuut.



Tuma Breaks

Tuma suficiente tempo pa recupera di calor causa pa temperatura, humedad y condicionnan.



Busca Sombra of Luga Fresco

Descansa na camindanan designa pa ta fresco.



Bisti pa e Calor

Bisti sombre y colornan cla, paña los y fresco si ta posibel.



Tene Wowo Ariba Otro

Monitoria bo mes y otronan pa señal di malesa di calor.



Si ta Traha cu Cara Tapa

Cambia locual cu ta tapa cara si ta muha of sushi.
Check ariba otro verbalmente cu frecuencia.

Prome Auxilio pa Malesa di Calor

Esaki ta señalnan di un emergencia!



- Comportamento of pensamentonan straño
- Dificultad pa papia
- Ataca
- Perdida di consciencia

- 1 >> YAMA 911 INMEDIATAMENTE
- 2 >> REFRESCA TRAHADO CU AWA Y IJS MESORA
- 3 >> KEDA CU TRAHADO TE ORA CU ASISTENCIA YEGA



Wak pa señal di malesa di calor y actua liher. Ora di duda, yama 911.

Si trahado experiencia:

Dolor di cabes of nausea
Debilidad of mareo
Hopi sodamento of cuero seco
Temperatura corporal eleva
Sed
Disminucion di urina



Tuma accion:

- >> Duna awa pa bebe
- >> Kita paña innecesario
- >> Move na un area mas fresco
- >> Refresca cu awa, ijs of fan
- >> No laga su so
- >> Pidi atencion medico si mester





MINISTER DI TURISMO TA YAMA DANKI NA E MEGA CRUCERO DI CARNIVAL CELEBRATION PA UN BIAHA MAS INVITA NOS MUCHANAN DI ARUBA PA SUBI Y HAYA UN RECORIDO



Minister di Turismo y Salud Publico sr. Dangui Oduber conhuntamente cu Aruba Ports Authority (APA) y Aruba Tourism Authority (ATA) ta yama danki na e mega crucero di Carnival Celebration pa un biaha mas invita nos muchanan di Aruba pa subi y haya un recorrido.

Esaki ta di 2 aña caba cu Carnival Cruise Lines (CCL) ta duna bek na comunidad di e islanan cu nan ta bishita. Minister Oduber ta hopi agradecido di oportunidad cu Carnival Cruise ta duna na e muchanan di Aruba. E aña aki a duna chens na e Fundacion di Buki di Pret Aruba. Buki di pret ta un buki anual gratis yena cu actividadnan pa e vacacion di school. Esaki ta e motibo cu Fundacion Buki di Pret a haya e oportunidad pa bay bishita e mega crucero unda e muchanan a keda masha impresiona cu e restaurantnan, pool deck, e mega slides y e trato servicial di e ful e ekipo di Carnival Cruise Lines.

Finalmente Minister Oduber a manda un danki na ATA, APA y Carnival Cruise Lines pa brinda un oportunidad unico na nos muchanan. Esaki sigur lo sirbi como inspiracion y ta siña nos muchanan di jong con importante e pilar di turismo ta pa Aruba.





REUNION CU ALTO MANDO DI CUERPO POLICIAL DI ARUBA TOCANTE E DESAROYO DI E DEPARTAMENTO



Diamars mainta, Minister di Husticia y Asuntonan Social sr. Rocco Tjon, a reuni cu e ekipo di Alto Mando di Cuerpo Policial di Aruba, pa tuma cierto decisionnan riba nivel strategico.

Manera ta conoci, den e ultimo añanan a inverti hopi den Cuerpo Policial pa loke ta trata infraestructura y material, y awo ta invertiendo den e parti di personal, pa asina por maneha e scarcedad cu tin actualmente. Diferente proyecto lo wordo cristalisa den e lunanan nos dilanti, pues a reuni riba e proyectonan aki, pero tambe pa garantisa e continuidad den aña 2025. Na oktober 2024 e klas nobo di Cuerpo Policial lo inicia cu 20 Agente Policial y dia 1 di november e otro klas lo inicia.

Banda di esaki, a haci palabracion pa na aña 2025 percura pa mas personal pa Cuerpo Policial, no solamente pa e departamentonan ehecutivo, pues Polis Uniforma, pero tambe pa departamentonan di sosten manera Bedrijfsvoering y HR, cual tambe ta sumamente importante.

A toca e proyecto di “Mobile Data Terminals”, cual ta un deseo grandi di parti di Cuerpo Policial pa por tin e computernan instala den nan vehiculonan, pa di e forma ey nan por poseer di mas informacion y asina nan por traha mucho mas eficiente, brinda un miho servicio na comunidad y alabes garantisnan nan propio seguridad. E proyecto aki ta den su fase final, pa asina por inicia cu e proyecto piloto e aña aki.

Tambe, a tuma algun decision a largo plaso, pa cuminsa prepara diferente renobacion grandi cu mester tuma luga, entre otro e opleidingsinstituut, lo bay finalisa e trabounan pa di e forma ey tambe por inicia cu e destaho pa asina por renoba esaki por completo.

Otro proyecto hopi importante ta e parti di sigui amplia seguridad den trafico, ya caba for di ministerio a aproba e fondonan adicional pa di e forma ey corte por garantisa mas “verkeerszittingen”, pa na momento cu infraccionnan den trafico wordo comet, nan por atende cu e partinan aki mesora den corte.

Por ultimo, pa loke ta Cuerpo Policial, e proyecto cu yama “takel en bewaardiensten” ta den su fase final, e contracto cu e compania cu a gana esaki ta wordo termina awo, pa dentro di poco esaki no ta un “knelpunt” mas pa Cuerpo Policial, y asina na momento cu e Agente constata cu un auto no ta cumpli cu diferente rekisitonan, e por kita e auto mesora for di caminda y un partner lo garantisa pa ful e maneho di e parti aki, y asina nunca mas lo tin un scarcedad di luga caminda e Agentenan Policial no por kita un auto for di caminda, esaki ta eleva seguridad den nos trafico. Pues, aki tres luna lo bolbe reuni cu Alto Mando pa asina wak e avansenan di tur loke a wordo palabra durante e reunion aki.





MINISTER ENDY CROES A FELICITA DELEGACION DI GIHAЕ TANG SOO DO ARUBA CU A CONKISTA 50 MEDAYA DEN CAMPEONATO MUNDIAL

Diahuebs ultimo, Minister di Enseñansa y Deporte Endy Croes a ricibi bishita di e delegacion di Gihae Tang Soo Do Aruba cu a representa Aruba dia 12 y 13 di juli 2024 den World Tang Soo Do Association World Championship cu a tuma luga na Greensboro North Carolina, Merca. Durante e atardi ameno, Minister Endy Croes a comparti cu e delegacion y a entrega nan un obsekio pa nan tremendo trabou den exterior. E delegacion di Gihae Tang Soo Do Aruba a konkista un total di 50 medaya: 23 di oro, 9 di silver y 18 di brons.

Un total di 1500 atleta di alrededor 36 pais a participa den e competencia aki entre otro, Argentina, Africa, Costa Rica, Chile, Ecuador, Inglatera, Mexico, Merca y Puerto Rico. Despues di 16 aña, Aruba a participa atrobe den e Competencia di Creatividad y a sali di tres luga. Pa participa den e competencia aki, a haci un precualificacion y solamente e ocho (8) miho gruponan por a presenta na e campeonato mundial. Nan a duna un bunita presentacion di e historia di Aruba, resaltando nos indigenanan di Caquetio. Locual a sobresali di Aruba tabata cu tur atleta a participa den Competencia di Creatividad, incluyendo e atletanan di cuater (4) aña di edad. Ademá di esaki, Aruba a pone un dushi ambiente, hibando musica di tambu en bibo pa nan presentacion.

Minister Endy Croes ta gradici presidente di Tang Soo Do Federation y "head coach" di Gihae Tang Soo Do Aruba Sra. Melissa Noguera, entrenado- y mayornan cu a contribui den e triunfo di e atletanan aki. Alabes, ta felicita e 44 karatekanan di Gihae Tang Soo Do Aruba cu a destaca den World Tang Soo Do Association World Championship y pone Aruba su nomber briya. Cu deseo, disciplina, dedicacion y determinacion ta logra. ■■■





MINISTER ENDY CROES TA FELICITA E HOBENNAN ATLETA SAMANTHA Y PRICILLA CARDONA CU A PONE ARUBA SU NOMBER BRIYA



Diabierna ultimo, Minister di Enseñansa y Deporte Endy Croes a ricibi e rumannan atleta cu a participa den e campeonato Panamericano de Patinaje di velocidad. Samantha Cardona Romero y Pricilla Cardona Romero a representa Aruba na Buga, Colombia dia 19 pa 21 juli 2024. Samantha ta un hobencita di 14 aña cu a competi contra 3 mil atleta di diferente pais y a titula campeon di Panamericano de Patinaje di velocidad 800 meter remate. Pricilla di 11 aña di edad a competi contra 7 mil atleta den su categoria 14+ y a konkista di 2 lug.

Esaki tabata prome biaha cu Aruba a participa den e campeonato aki. Sr. Cardona, tata di e hobennan atleta a gradici Minister Endy Croes y Lotto pa Deporte pa yuda nan pa por a participa den e campeonato na Colombia. Tambe, Sr. Cardona a encurasha e hobennan cu ta interesa den “rolschaatsen” pa practica e deporte aki cu ta hopi bunita y cu ta creciendo mundialmente.

Minister Endy Croes a felicita e mayornan di e hobencitanan aki cu ta sostene nan yiu completamente den e deporte aki. Alabes, ta felicita Samantha y Pricilla cu a destaca den e campeonato internacional na Colombia y a pone Aruba su nomber den halto. Cu deseo, disciplina, dedicacion y determinacion ta logra.



2024

AÑA DI STABILIDAD Y PROSPERIDAD



Gabinete Wever-Croes

Ora nos cana den cayanan di San Nicolas cu ta dorna cu artenan mahestraal aki, nos ta realisa cu bunitesa por wordo haya den luganan menos spera. Arte di muraya ta e language visual cu ta conecta culturanan, na unda cu por aprecia historia, color, fantasia y dedicacion.

